

# NIGITIWATADIGIDI LIWAKATE JOÃO

Nagadi liwakate João liwakatetigi Gaio ane lacilo loiigi Cristo.

João yalagata meliodi me ninitibece naga dibodicetibige Gaio midioka limedi me nakato Goniotagodi, codaa mele me dibatibigege lanakepodi anonakato Goniotagodi ane icogoticogi eletidi nigotadi. Pida бага yapetege Diótfrefes anepaga anagaxakenegegi, codaa me beyagi me dotagatibigeeledi gonioxoadipi, codaa baadaga dibategeeledi gonioxoadipi digoida ligeladi anoicogoticogi eletidi nigotadi. João ele me yalagatibige Demétrio, codaa João lowoogo migo dalita Gaio.

## João yecoaditibige Gaio

<sup>1</sup>Ee ane ee oxiiigodi lacilo loiigi Cristo, jiditibigagaji nagadi notaganagaxi, yemaanigi Gaio, ane gademaani leegodi gotiwagatakanenegegi anewi.

<sup>2</sup>Yokaagedi yemaanigi, jipokotalo Aneotedogoji minoatawece eletedagadomi, codaa me digicata ane dalicetagadici, digo anee gadiwigo mele. <sup>3</sup>Igaataga eliodi me idinitibece nigijo mijo gonioxoadipi anonotiwa, oada jognatematitiwa midioka limedi moteteni catiwedi gadaalegena nigijo niigaxinaganegegi anewi, codaa oyatemati midioka limedi me iwagati anewi. <sup>4</sup>Nigina me jibodicetigi ionigipi moyiwagadi anewi, idioka limedi me dagaxa me idinitibece.

<sup>5</sup>Yokaagedi yemaanigi, jowoogodi me jakataga me gadinakatonegegi nigina mawii gabakedi leegodi agica daaditegeleta, nigina maxawani gonioxoadipi, nigina ane digicata me gadowoogotagipi. <sup>6</sup>Nigijo gonioxoadipi anonotiwa etigadatematii anodaageni miditaga lapo anonakato Goniotagodi digoina, nigica anodaageni memaani eletidi gonioxoadipi. Jemaa maxawanitece okanicodaagica anoyopotibige me wiajeega, awii ane yemaa Aneotedogoji. <sup>7</sup>Igaataga nigijo naga noditicoaci ligelatedi me wiajeega, mowo libakedi Cristo, agoyemaa modibatege gaantokaagidi moyaxawa me wiajeega miditaga nigijo oko ane dogoyiwagaditeda Goniotagodi. <sup>8</sup>Enice leeditibige me jaxawanaga nigidi gonioxoadipi, amaleegaga jakataga me jaxawanagatece libakedi moyelogoditibece niigaxinaganegegi anewi.

### João yalagata Diótrfes ijaa Demétrio

<sup>9</sup>Jigijo me jidikotibige nigidi lapo anonakato Goniotagodi digoida makaamitagatiwaji, pida nigijo Diótrfes ane lemaanigi me godacilo, awatacotece niginoa godotaga. <sup>10</sup>Joanigidaa leegodi nigejoticogi makaamitaga, odaa jao nigidi oko monalagatibige niginoa lakataga Diótrfes. Dotagatibigogoji, diwitakatibece. Codaa anigidokidata me loenatagi, pida eleditace adibatege gonioxoadipi anotota, codaa eleditace aika eledi oko modibatege gonioxoadipi digidiaa lotokagadi ligelatedi, nigina oko ane domogoyemaa modibatege gonioxoadipi. Codaa domaga iticoiticoace wetice niikanagaxi nigina gonioxoadipi dogodibatege eledi gonioxoadipi.

<sup>11</sup>Yokaagedi yemaanigi, jinaga domaga anowiikita nigina oko aneo ane beyagi, pida anowiikita nigina oko aneo anele. Nigina oko anidioka limedi meo anele, joaniginiaa nebi Aneotedogoji. Pida nigina oko anidioka limedi meo ane beyagi, agica daga yowoogodi Aneotedogoji.

<sup>12</sup>Inatawece oko ele modotagatibige Demétrio. Lewiqa ikee niigaxinaganegegi anewi. Codaa okomogoko ele me jotaganagatibige, codaa owoogoti me jelogotaga anewi.

### Owidijedi lotaga João

<sup>13</sup>Eginoateda owidi ane domaga jelogoditedagawa, pida ajiditedini. <sup>14</sup>Igaataga inibeotege me age me gadati, codaa me eetawece me gadotaganegeni.

<sup>15</sup>Jemaa Aneotedogoji meote mele gadaalegena. Godokaagetedipi anina digoina meetaga eliodi moyecoaditibigagaji. Oko godecoaditibige oninitecibeci godokaagetedipi anidi makaamitaga. Odaa jigidaagee.